

Kerajaan longgar perolehan mudah cara pelaksanaan Kampung Angkat MADANI

BH 12/7/2024

Kerajaan menetapkan beberapa kelonggaran perolehan berbanding tatacara perolehan sedia ada khususnya untuk memudahkan cara pelaksanaan Kampung Angkat MADANI.

Menteri Kewangan II, Datuk Seri Amir Hamzah Azizan, berkata setiap ketua setiausaha kementerian, ketua perkhidmatan dan ketua pengarah turut diamanah untuk memantau pelaksanaan projek di kampung terbabit bagi memastikan kerja pelaksanaan menaik taraf kemudahan asas disiapkan sepenuhnya tahun ini.

Justeru, katanya komitmen kerajaan negeri dalam memastikan usaha memelihara dan menyelenggara infrastruktur asas ini adalah amat diharapkan demi

menjamin kelangsungan dan keselamatan manfaatnya dinikmati penduduk dan komuniti kampung secara berterusan.

"Kelonggaran pertama adalah kebenaran pelaksanaan secara gotong-royong dengan had sehingga RM500,000 dilaksanakan oleh komuniti setempat dan disediakan secara pemberian terus.

"Kedua, had nilai lantikan terus ditingkatkan sehingga RM200,000 dengan tumpuan kepada kontraktor tempatan G1 dan berdaftar dengan Lembaga Pembangunan Industri Pembinaan (CIDB).

"Ketiga, had nilai perolehan kerja *requisition* secara undian ditingkatkan sehingga RM200,000 dengan tumpuan kepada kon-

traktor tempatan G1 dan berdaftar dengan CIDB," katanya pada Waktu Pertanyaan-Pertanyaan Menteri di Dewan Rakyat, semalam.

Beliau menjawab soalan tambahan dikemukakan Datuk Seri Sh Mohmed Puzi Sh Ali (BN-Pekan) yang meminta penjelasan berhubung kelonggaran perolehan yang diberikan untuk mempercepat pelaksanaan projek di Kampung Angkat MADANI.

Tingkatkan had nilai sebut harga

Selain itu, kerajaan juga menetapkan kelonggaran membabitkan had nilai sebut harga yang ditingkatkan kepada melebihi RM200,000 sehingga RM1 juta dengan tumpuan kepada kontraktor tempatan Bumiputera G2 dan

G3 yang berdaftar dengan CIDB.

Mengulas lanjut, Amir Hamzah berkata, pengecualian di bawah Arahan Perbendaharaan 182 (AP182) turut diberikan kepada projek yang dilaksanakan oleh agensi pelaksana selain daripada Jabatan Teknik (JKR dan JPS).

"Kerajaan turut memberikan pengecualian kepada pematuhan pelan pra kelulusan (PAP) dan penggunaan sistem binaan berindustri (IBS) sekiranya berkaitan.

"Kelonggaran lain merangkumi pengecualian penggunaan sistem ePerolehan; pengecualian terhadap penggunaan kontrak pusat atau kontrak panel berpusat dan kebenaran untuk mem-pakejkan perolehan tahunan," katanya.